

## Pokvašen

Najveće iskušenje je kada nas ljudi vide  
Boljim od nego što jesmo.

Silazeći iz sobe u avliju šejh Mustafa se spremio da ide u čaršiju. U dvorištu uze ibrik te prosu dosta vode u lijevu ruku a zatim pokvasi pantalone među nogama. Često bi to radio. Pročit ćete o meni ono što ja hoću a ne ono što vi hoćete. Na izlazu ga ugleda komšinica Fatima i odmah skrenu pogled. Na mostu dva dječaka se osmehnuše stavivši ruke na usta a onda ozbiljnog izraza lice poselamiviši hodžu Muju. Prolazio je kao da se ništa neobično ne dešava. Usput ga susrete stari Mehmed-aga, pogledavši dole sasvim ozbiljno upita- „Jesi li blestan hodža Mujo?“

„Nisam“-kratko odgovori Mustafa i nakon što malo promuhabetiše on nastavi prema čaršiji. Pričat ćete o meni ono što ja hoću a ne ono što vi želite.

Približavao se u međuvremenu travar i hećim Mahmutaga iz Podgradske mahale. Nosio je trave u kožnom torbaku na leđima. Kada se približi Mustafi otvori usta sa podsmjehom ali odmah na njih stavi ruku .

„Loš mjehur“-procjedi tvrdo,  
„Trebaju ti trave.“

„Trebaju kenjcu i magarcu“-odbrsi mu Šejh. Važio je za „ters“čovjeka ali nije bio već se amo obraćao svakom na njegovom nivou a shodno ljudskim namjerama i sklonostima. Jer je Imam Ali a.s. rekao: „Tamo je blagost neprikladna strogost je blagost.“

„Nisam mislio ništa loše“-promuca Mahmutaga i vrati torbu na rame.

„Nisam ni ja“-produži Mustafa dalje i ne pogledavši ga. Mislit ćete o meni ono što ja hoću a ne ono što vi hoćete. Usput susretnu i jednu ženu kršćanske vjeroispovjesti. Vidjevši mokre pantalone između nogu ona podiže ruku i prekrsti se.

Promrmlja nešto neodređeno prošavši pored šejh Mustafe. On ne reče ništa uopšte se ne obazirući.

Kada se Imam Ali a.s. vraćao iz bitke na Sifinu žene poginulih neprijateljskih vojnika su ga proklinjale, njega i njegovu vojsku. On se uopšte nije obazirao, niti je tome pridavao ikakav značaj.

Jednom prilikom je rekao kako su žene slabe po snazi, čudi i razumu a Kur'an kaže kako „one imaju isto toliko prava i dužnosti koliko i muškarci ali je Allah dao jedan stepen prednosti muškarcima.“ Ovaj stepen prednosti se ostvaruje preko PRIRODE. Ovaj ajet je bio povodom mnogih nerazumjevanja i zloupotreba tokom povjesti a upravo se u tom ajetu kaže da žene imaju isto toliko PRAVA koliko i muškarci.

Hodža Mujo dođe do kahve u centru grada i sjede unutra. Nekoliko ljudi je sjedilo dvojica okrenuše glavu kada vidješe pokvašene pantalone u međunožju.

Hasan, veliki obejšenjak i spadalo je sjedio sam. Bio je prisutan kada je hodža Mujo pretvorio vino u sok ali kako narod dobro kaže, đavo ne da mirovat.

Držeći čibuk u ruci on se izazivački nasmija: „He, he, počo' je pušcat' poda se.“

Mustafa ga je potpuno ignorisao jer i Kur'an kaže- „Nećeš ti uputiti koga hoćeš“...

A na drugom mjestu... „kada bi im svi dokazi došli, opet bi oni koji neće da vjeruju rekli-ovo je prava čarolija“....

Hodža Mujo još više raširi noge da se pokvašeni dio još bolje vidi. "Vidam, vidam" - zavika neko sa strane, gladajući šejha pravo u lice. A on je šutio i mirno pio kahvu. "Savjeti" su bili zlonamjerni i nije im obraćao nikakvu pažnju. Mislit ćete o meni ono što ja hoću a ne ono što vi hoćete. No, valja reći da obični ljudi često ignorišu i podozrijevaju i kada su u pitanju dobronamjerni savjeti. U tom smislu je Imam Ali a.s. rekao: "Ponekada je sumnjihčenje jedina nagrada koju žanje savjetnik."

Poznata predaja također priopćava da mudrost ima deset djelova a da je devet u šutnji. Nakon što popi kahvu šejh nastavi prema Podgradskoj mahali. Nekoliko djece se glasno zasmija. Trgovac Muhamed se zaustavi pored njega i upita treba li mu pomoć. "Treba tebi" - odgovori mu Mustafa.

„Farzove ne klanjaš, a na džumu ideš da te drugi vide i pohvale.“

Ovaj se zabezaknu; ...kako zna, sinu mu i on pobježe gotovo trčeći... Na kraju, Mustafa se vrati kući. Presvuče se i sjede na sofu. Mislit ćete o meni ono što ja hoću da mislite a ne ono što vi hoćete. Naravno, većina nikada nije shvatila zamku niti melamijski znak.

<https://jasminko.github.io/>



(Slika-Nišan Šejha Mustafe Žuje)